

國朝耆獻類徵初編卷三百二十五目錄

將帥六十五

嵩溥

富僧德

韓肇慶

保芝琳

宗室敬敷

瀉慶

棍楚克策楞

那桑阿

斌良

張成龍

趙龍田

詹功顯

國朝耆獻類徵初編卷三百二十五

通奉大夫前署江西巡撫江西布政使司布政使湘陰李桓輯
將帥六十五

嵩溥

嵩溥伊爾根覺羅氏滿洲正藍旗人父富綱雲貴總督自有傳嘉
慶四年嵩溥由廕生引見以主事用籤分戶部八年補官九年
升員外郎旋調禮部員外郎十一年玉牒告成嵩溥以曾與纂
輯議敘賞加二級十二年京察一等引見記名以道府用十
四年三月升郎中八月授陝西潼商道十九年署按察使二十五
年升江西按察使道光元年二月調湖南按察使八月署布政使

九月遷廣西布政使二年三月護理巡撫閏三月奏審明會匪羣
監袍等糾結拜會情事按治如律又奏請將距省較遠太平泗城
鎮安三府所屬軍流等犯歸左江道審轉百色武緣兩處人犯歸
右江道審轉 從之三年調江西布政使仍署廣西巡撫四年奏
秀峯宣城兩書院經費不敷請將膏火餘存銀兩置買田畝所得
租穀糶價藉資添補如所請行三月護理江西巡撫五年九月擢
貴州巡撫十月查辦江西各屬倉穀奏准缺穀一萬石以上限三
年五千石以上限二年一千石以上至數百石者限一年補足六
年奏請籌辦苗疆保甲 上韙其議七年奏嚴拏匪徒酌議辦理
章程疏言貴州地僻山深向有紅尙黑尙兩種賊匪結黨行強民

遭擾害甚至勾結外來遊民盤踞各州縣交界出沒無常若派委員弁分往查拏勢必聞風遠遁除州縣地方偵有匪徒蹤跡迅速查拏外其遠鄉僻壤地方官耳目難周民人應責成鄉約保長苗人卽責成土弁寨頭實力稽查遇有爲匪之人窩匪之家密行報官立時拏獲究辦其各府廳州縣交界及與鄰省接壤嚴飭文武員弁會同鄰封設法協緝不使一名漏網然此等匪徒與其懲創於旣犯之後不若嚴禁於未犯之先查近年直省究辦匪徒有鎖繫鐵桿之例分別懲治嗣後黔省辦理搶竊等案如有冒頂大一小五名號除犯死罪仍從重科斷外其軍流罪無論爲首爲從均於本罪上加一等治罪若罪止枷杖著於枷責後鎖繫鐵桿一枝

定限一年如能改悔准予釋放若不悛改加等治罪 上從之三月會同雲貴總督阮元貴州學政許乃普奏請添設郎岱廳學校學額十名廩增八名將永甯州學正移駐郎岱廳學四月奏與義等處入官苗田於嘉慶三四年勘定後陸續招佃領種至嘉慶八年始收齊租穀自八年起照次年夏收中米價值變價解存藩庫以爲興義等處支發土弁工食之用十一年奏請黔省夫役之法有驛各處所設立夫頭令民苗擇殷實勤慎者公舉充當遇有差務由地方官立定章程分別傳示將價發給夫頭承領雇募夫頭等如有濫索多派書役扶同科斂一經查出卽照蠹役嚇詐例治罪十二年會同雲貴總督阮元奏同仁府屬之盤石司巡檢係屬

開員黎平府屬之錦屏縣幅員褊小亦屬冗濫請裁汰以昭覈實
錦屏所管地方撥歸開泰縣管理向設學額六名仍舊作爲錦屏
鄉學歸開泰縣考試原設教職二員請裁去訓導仍畱教諭以資
訓課錦屏地方民苗雜處稽查巡防未便乏員請將擬裁之磐石
司巡檢移駐錦屏以資彈壓改爲錦屏鄉縣丞先後奏人均如所
請行十三年七月以古州都江二廳上年被水較重奏請賑卹
詔如所請九月授漕運總督十四年二月 命暫緩赴漕督任卽
行來京陛見五月暫署兵部左侍郎六月補兵部右侍郎七月轉
兵部左侍郎兼正藍旗漢軍副都統八月授熱河都統十五年三
月奏骸疾舉發請開缺調理 上以熱河都統事簡儘可照常辦

理不必開缺十一月奏參建昌縣知縣毓祥緝捕無能請卽革職
允之十六年訊明翁牛特在旗鎮國公桑噶巴拉呈控扎薩克多
羅郡王喇特那濟哩第各款究出賄囑各情請暫將翁牛特在旗
鎮國公桑噶巴拉革去公爵徹底根究得 旨允行十月奏查明
古北口八旗夏秋二季本色兵米應採買七千石以資支放十七
年二月奏查明圍場樹木被斫情形請將扶同弊混之翼長伍爾
圖防禦穆棟阿一并革職以示懲儆又奏圍場章程四條一圍場
地方遼闊請飭令附近圍場之蒙古扎薩克派員不時巡邏以昭
慎重一圍場官兵獲犯起出木植鹿茸等物例准充賞往往有偷
斫木之犯從中影射冒爲充賞公行售賣應請將該官兵充賞

之物每月彙報該總管以備稽查一圍場附近地方每有奸民開設客店窩藏匪犯應請嚴行驅逐懲辦以清盜源一圍場被斫樹木查有根盤請責成該總管履勘查明徧加印烙不時稽查以杜偷竊匪犯以新混舊之弊 從之三月訓福州將軍十九年九月召來京十月奏籌議查拏販運鴉片章程一外洋宜先設法訪查以杜偷越一口岸宜分別稽查以杜偷漏一水陸宜更相嚴禁以專責成一關口宜令委員親自查驗以杜夾帶十一月奏嚴禁內地奸民偷運煙土接濟夷船水米巡緝兵船得規買放代爲迭運是奸民一日不除夷船一日不斷惟有督飭沿海員弁實力嚴拏俾夷船難以寄碇以靖海洋又福建海洋盜劫仍屬時有商船憚

於暢行於稅課大有關係應飭沿海水師各營汛弁實力截拏加重懲處庶於海洋關稅兩有裨益疏 聞 上可其奏十一月調綏遠城將軍二十年 命以原品休致二十六年卒子昆壽原任戶部員外郎昆嘉禮部筆帖式昆聯候選筆帖式昆虔兵部筆帖式

右 國史館本傳

富僧德

富僧德瓜爾佳氏滿洲鑲黃旗人由親軍擢藍翎侍衛乾隆六十年黔楚逆苗滋事陷湖南乾州隨大學士貝子福康安四川總督和琳剿賊於貴州時首逆石三保屯黃瓜寨樹柵以阻官軍四月隨福康安閒道奪黃瓜山俯攻賊寨破之又敗首逆吳半生吳逆糾黑苗與石三保合大軍分路攻入富僧德與總兵達音泰以貴州兵爲一路連下木城石卡數十直抵大烏草河特賞荷包升三等侍衛七月湖廣兵自鎮筸入合克古丈坪賊遁富僧德隨護軍統領德楞泰采入窮追九月圍吳半生於高多寨吳逆窮蹙自縛詣軍前捷聞下部優敘嘉慶元年六月擒石三保進克馬鞍

山規取乾州和琳上其功 賜噶爾薩巴圖魯名號並 賚銀百兩七月福康安和琳相繼卒於軍以德楞泰及將軍明亮等代之分兵進討富僧德與侍衛溫春爲右路先渡河復乾州追斬首逆石柳鄧苗疆平再交部敘功是年邪匪起湖北蔓延川陝二年隨德楞泰移師入蜀時達州首逆徐添德等陷東鄉縣總統宜縣帥師復之與德楞泰合屯馬耳峯四月富僧德與都司蒲尙佐等擊賊於馬耳峯下山溝殲擒甚眾賊北走太平襄陽首逆齊王氏等自楚入川與之合分號滋擾六月襄陽黃號齊王氏姚之富樊人傑竄至夔州窺伺巴東歸州我兵沿江而下擒賊謀於歸州之北還敗賊夔州解白帝城之圍富僧德功多遷二等侍衛八月齊姚

二逆自奉節入楚復入陝合襄陽白號高均德西走漢中德楞泰
明亮追之十一月隨明亮由高臺寺與德楞泰夾擊斃賊數百十
二月破賊於唐家壩三年三月賊擾山陽商州旋竄藍田我兵掩
擊賊走楚境追圍之鄖西三岔河齊姚二逆投崖死 命德楞泰
查出力將弁以聞擢富僧德頭等侍衛尋敗高均德於雒南賊入
秦嶺越老林北趨德楞泰等統大軍扼之於華州而令富僧德以
步兵入山追躡賊出至高塘遇大軍返走復與富僧德遇賊敗死
者數百人遂由鎮安甯羌入廣元依通江藍號冉文儔於大神山
適樊人傑及達州青號徐添德襄陽黃號龍紹周諸賊皆會眾數
萬七月德楞泰尙書惠齡合兵破大神山賊欲走箕山就巴州白

號羅其清富僧德以索倫兵截諸黃渡河高均德馳馬執旗犯陣
富僧德射其左肩傷而逸賊大敗斬冉文儔之弟文字及賊目禹
斯珍賊尋竄箕山附羅逆環屯山下我兵佯退富僧德等設伏以
待箕山賊出敗之斬級二千賊驚潰富僧德偕侍衛墨爾歡保掩
擊之又斬五百級擒賊目張國治十月攻樊人傑於廖家碛箕山
賊五千來援富僧德與墨爾歡保從山左右抄擊敗之進奪要隘
樊人傑等皆逃遂與諸軍平箕山斬羅其清冉文儔四年樊人傑
龍紹周復走西鄉阻漢江還趨大安邦德楞泰令富僧德擊之射
殪賊目張士虎擒教首劉學仁冉文儔既死兒子添元代領其眾
狡黠善用伏五年正月挾青黃線號及白號餘黨度向瑤雷世旺

等五萬眾渡嘉陵江川西震動二月隨德楞泰馳擊連敗之於江
油梓潼復敗之於黃茅嶺賊保馬蹏岡設伏於前我兵搜得盡殺
之因大敗賊眾擒添元得 旨優敘四月白號餘匪渡潼河趨成
都官兵邀斬雷世旺於蓬溪富僧德追賊至潼河溺水者七八百
賊至達州又合藍號冉添泗趨涪州官軍出鄰水截之富僧德伏
兵七孔溪俘賊七百磔僞軍師何上達六月賊掠南江縣峒寨富
僧德偕提督賽冲阿等冒雨攻長池壩賊巢賊還救縱擊之斃賊
千計時樊人傑及白號餘黨鮮大川復竄墊江庾向瑤及青號趙
麻花等分擾川東北齊王氏之黨齊國謨入巴州七月大兵擊走
樊逆擒庾向瑤等富僧德功皆最十二月齊國謨走儀隴富僧德

先扼觀音河與追兵夾攻斬齊逆德榜泰上其功先後交部議敘
四川賊勢既衰高均德餘黨高二竄甘肅六年正月入陝犯山陽
富僧德赴援斬千八百級追至鎮安射殺高二三月龍紹周自大
甯竄平利遇官兵折入湖北竹谿登山拒戰富僧德以精騎襲之
賊潰走四月賊走房竹我兵邀之於山口不及富僧德急追殺賊
千餘拔出難民無算賊至竹谿樊人傑及藍號陳朝觀等自陝來
會旋入白河圍民寨我兵別攻黃石板賊營射陳朝觀獲之賊懼
解圍沿洵河而東富僧德領前隊追之賊自紫陽新灘渡添德溺
死八月隨賽冲阿追龍逆敗賊於平利賊竄興山冒雨進攻殲擒
數百人屯九道梁以遏賊勢十月入川剿白號劉朝選於開縣劉

逆僅以身免又遮敗青號陳侍學於大竹以樊人傑等勢猶熾復入楚七年四月師次巴東偵知樊逆將就藍號蒲添寶於東湖隨德楞泰疾馳一日夜出二賊聞賊大驚解去因逐樊逆其黨王國賢還戰富僧德等擊破之東追蒲添寶於上龕山中閒道繞入賊恃險無備敗走乘勝追擊僞先鋒冉起本揮刀拒戰富僧德射中其背馬躓墜崖得其翎帽諭曰富僧德俟辦竣蒲逆後以應升之缺升用樊人傑趨均房提督長齡截之入竹山德楞泰分兵追蒲逆自率富僧德等攻樊逆於白鐵溝山中會大雨驅賊臨河三面蹙之首逆樊人傑溺死奏入賞富僧德副都統銜復交部議敘七月副都統色爾滾追蒲逆入興房交界山中請濟師富僧德